

NWER NYI POL NYONO TV ANEB ERO BA LI GO KOLOSA

¹ Me Pol ji koro Esowo, á yehk-m no, n li ntiingetib a Kraist Jisos, awahr a Timoti mmonannee ejahre,

² e kp'nyono nwer nyia tv aneb Esowo ba li go Kolosa, bo jio ji li abonanee go ejang bi Kraist, ba kpi ekakesehk.

Nong, Esowo Nso ejahre ka-n nnoobo, a elkoono.

Ero bi Pol jo kak ka Esowo

³ Ngare anyehng anyehng nyi e l'kak ero ka-n, e kpo kak Esowo saam, ye ji li nde no Ntul ewahre Jisos Kraist.

⁴ Tibre wahr ebwuk bade ekakesehk ejahne ji n kp'toono Jisos Kraist, fere tob wuk ana aneb Esowo kpee kpo kor-n.*

⁵ Tibre ekunukpu ejahne li go nsol nyi Esowo kuuru no bum-n go ejahbetul Esowo,† nsol nyio nyi n ma tohko wuk, eji bo tong-n alum nya li go etingitingi, nya li nnoobo etib.

⁶ Etib bia bi bo ma ba tiingi go egahne kp'yeere rehng go ejang njini abehng abehng, fere kp'kake elfuulu. Ano wo fvfo ma tob lim go egahne ellong, bomo gona efung bi n gbo mbang wuk, fere kahn nnoobo nyi Esowo, jang jang ana li no go etingitingi.

* **1:4 1:4** Ef 1:15 † **1:5 1:5** Rom 8:24-25

⁷ Tibre á kpili goji Epafras ji li nkakesehk a nlokeltum no Kraist ka-n.‡ Á kpo lim eltum ana wahr, ye ji kpo sahb kor-r kor.

⁸ Ye wo ma-r tong bade elgoro enahne ni á kpi no, ni Etingi Etohko ma-n ka.

⁹ Bomo go efung bi e wuku bada nsol nyio, e ka tiki rahke ero akake ka-n, fere jo gboongo Esowo, eji á l'gbal go elkahne ni Etingi Etohko kpo ka, fere tob jol anebe ngbere, fere kahn mbang enye.§

¹⁰ E kpo kak ero re, wahn lim eljini ni bahke fuumu a ni Ntul a Jisos, ni kpo kor-e ngare anyehng anyehng, wahn fere jo kab akab go nnoobo eltum anehng anehng ni á kp'limi, fere jo gbal go elkahne ni Esowo,

¹¹ fere bel eko ji biingi a egburu nsahm nyi Esowo, nyio nyi ellub ene, eji á l'mal elkpuumu, jo kpooro go eyebatahng,

¹² fere jo kak Esowo saam, ye jio ji ma-r ka nsahm re wahr tob li elkv ene semme a aneb Esowo bako ba ma tob li etul b'nehm ana wahr, bio bi ellenge.

¹³ Á ma-r tahre yehke go eju bio bi ejanng, feere a nahre go ejahbetul jio ji Mmon ewe no kpo kor-e s'sehng,

¹⁴ ye jio ji ma-r fak yake, fere tahm ka-r go egahre abiafem.*

Nne awo li Kraist?

‡ 1:7 1:7 Kol 4:12 § 1:9 1:9 Ef 1:16-17 * 1:14 1:14 Ef 1:7

15 Kraist wo li eftu ji Esowo bi nne l'ki-e ma nyehn.† Ye wo li nne no gbo mbang jini, njini kehm jolo.

16 Esowo ko nsahm nyi Jisos Kraist, lim nsol kpee nyi li go elbung, a nyi li ndi, nsol nyi e kp'nyehne go amahr, a nsol nyi e kil elnyehne go amahr, a nti etul, a afladi, a atul, go atubesi.‡

17 Á tohko jol, ejum ajehng ajehng kehm jolo. Ye wo kp'wahng nsol kpee kp'jene go elkoono.

18 Ye wo li esi ji ngubjing enye nyi li aneb ero.§ Ye wo li mbomannahb. Ye wo li ngbokambang a nne no gbo mbang nyahme go elkv, eji á l'jol ngbokambang go ejum ajehng ajehng, fere jol ntubesi.*

19 Tibre jo yebe Esowo atahng sehng re, á rod ellub ene kpee, ba woomo Kraist go atahng.

20 Esowo sehng go ege, ko nsol kpee, feere a nyi go ege, ba jol go elkoono anehng, afi nsol nyi jolo go ndi, afi jolo go elbung. Tibre alung ma Jisos kpo go ekros ma wahng Esowo ma lim nsol kpee jol go elkoono.†

21 Wuku wuku n jolo ajahmjahm go esamahr bi Esowo,‡ fere jol anebekv ebe go egahna ntir, fere jo lim ab'bi nsol.§

22 Anv, tib go elkv ni Jisos kpo go ngubjing ni wahng Esowo ma-n lim re wahn jol go elkoono awahn a ne, eji á l'lim-n, n jol saang, k'bel eb'bi ajehng ajehng, nne awohng awohng ki-n jo ma ka ebi, á fere ko-n ba a nahne go ege esamahr.

† 1:15 1:15 Hib 1:3 ‡ 1:16 1:16 Jon 1:3 § 1:18 1:18 Ef 1:22

* 1:18 1:18 Ell 1:5 † 1:20 1:20 Ef 1:10; 1 Jon 2:2 ‡ 1:21 1:21 Ef 2:12 § 1:21 1:21 Rom 5:10

23 Esowo bahk-n limi ano, n l'fere soro asi go ege a mbang, fere yiimi t'tahne, k'ren, k'yehke ekunukpu ejahne goji Esowo, ye ji n wuku alum enye nya bo ma bung tong nne awohng awohng go njini, nyao nya me Pol ma jol nlokeltum.

Eltum ni Pol jo lim ka aneb ero

24 Eltim kp-m yebe go egame erem bi n kp'nyehne tib go egahne esi.* Tibre n kp'gohro nyehn erem bi Kraist nyehne no sa go egama ngubjing, tib go esi ji ngubjing enye nyi li aneb ero.

25 Me n fere jol nlokeltum abo. Tibre Esowo bi ka-m eltum nia re me n lim ka-n. Eltum nia li re, me n lim ane kahn alum Esowo gbalee.

26 Alum Esowo nyaa li ejum ji Esowo behre no mahne mahne re nne awohng awohng k'nyehn, anv, yeblenng ka ane ebe,†

27 ba á ma yehke re bo kahn afang nya ellub ni wob go ejum ji Esowo behre mahne mahne, ji li Kraist ji wob go egahne atahng, wahn ji li ane ba ki li Jus. Ye wo wahnge ekunukpu ejahne li re, m bahke jolo go ellub ni Esowo.

28 Ye wo, e kpo bung bada ne, fere jo rehke nne awohng awohng, fere jo tib-e ajoobo nsol nya elkahne, eji e l'ko nne awohng awohng ba ka Esowo ana nne no ma gbal go ejang bi Kraist.

29 Nsol nyia nyi wahnge n kpo gbeld, fere jo n'nok go nsahm nyi Kraist ka-m no, nyi li egburu nsahm go egame atahng.

* 1:24 1:24 Ef 3:13 † 1:26 1:26 Rom 16:25-26

2

¹ N kp'sebe re wahn kahn ana n kp'noko go eltum ni n kp'limi ka-n, fere lim ka ane ba li go Laodisea, a ane bako kpee ba kal-m tob nyehn,

² eji bo l'bob eltim, elkoro wahng, bo jol ajehng ana el'lehke kpehre a ntem, fere fang go elkahne, k'jo bel nfaabe anyehng anyehng, fere kahn ejum ji li mbehr mbehr ji Esowo, ji li Kraist.

³ Goji Kraist wo Esowo behre afang nya elkahne ene kpee, ni á kp'kahne.*

⁴ N kp-n tongo nsol nyia, eji nne awohng awohng l'ki-n nehm go efoolo nnyo.†

⁵ Jol eji n ki l'li a nahne go ngubjing, me n noa a nahne go etohko.‡ Atahng kp-m yebe, eji m ma seb kahn ana n kp'jene go nseenge, fere yiimi t'tahne go ekakesehk ji n kp'toono Kraist.

Jo gberen elnahne, eji nnene l'ki-n taare afang nya Kraist

⁶ Anv, eji n ma ko Kraist Jisos kak go egahne atahng ana Ntul ewahne, jo jenen a ne!

⁷ Rehnen alohk go ege ana eti kpo rehne alohk go ndi, wahn fere gbal go ekakesehk, yiimi t'tahne, k'tiki yake mbang nyi Jisos, ana bo tib-n no, wahn fere gbal go saam akake.

⁸ Jo gberen elnahne, eji nne l'k'ranng ntir atahng enyahne go elkahne nehka nehka ni ane leeme goji babnde ebo, ni ki li ni Kraist, fere nehm-n go awak nya atohko nya li go njini nyia.

⁹ Tibre Esowo ebtahm kpee woomo Jisos go ege atahng.

* **2:3 2:3** 1 Kor 1:24,30 † **2:4 2:4** Kol 2:23; 2 Tim 3:5 ‡ **2:5 2:5**
1 Kor 5:3

¹⁰ Owo wahnge m̃ ma bel elkpin kpee, eji ñ sehngge go ege, ye ji li ntubesi no atul kpee, a abafiladi. §

¹¹ Go ege wo, bo yehk-n nrur, nrur nyehka nyehka sang, nrur ayehke nyi Kraist nyi, nyi lohngo re, nne bahke ludu eso jio ji abiafem tub go.*

¹² Eji m̃ bele ewohngalahb, lohngo re, bo ma-n kpa kak a Kraist. Ewohngalahb ji m̃ bele no ebtob lohng re, wahn ebnyahme a Kraist tib go egahne eltaame, tibre wahn ebtaame tv nsahm nyi Esowo bi nyahm-e go elkv,†

¹³ wahn ji jolo ane ba kpo no tib go egahne abiafem, a nrur nyi ñ ki yehke, Esowo ma-n lim re wahn jol go elkpin a Kraist, eji á ma tahm ka-r go egahre abiafem.‡

¹⁴ Yebyake mbong nyi e bel-e no ka-r, nyi e jol tiki gal. § Á yake ka-r, eji á rodo nwer a mbong nyio kum go ekros.

¹⁵ Go ekros wo, á ga atul kpee, a abafiladi, fere taare bo nsahm, riki bo ndon go elkab ane, fere kunu bo akpade.

¹⁶ Ano wo fvfo ñ l'k'taame nne awohng awohng jehke ntahm ka-n bada nsol nyi ñ kpo li, fere jo wo, afi jolo abarebare afung, afi jolo efung bi ebareka ma lahm, afi fere jolo efung Esabat.*

¹⁷ Nsol nyia kpee li go elfoongo ni nsol nyi kp'bake go es'song. Atingitingi nsol li goji Kraist.†

§ **2:10 2:10** Ef 1:21 * **2:11 2:11** Rom 2:29; 1 Pit 3:21 † **2:12 2:12**
 Rom 6:4 ‡ **2:13 2:13** Ef 2:1,5 § **2:14 2:14** Mat 18:27 * **2:16**
2:16 Gal 4:8-11 † **2:17 2:17** Hib 8:5; 10:1

¹⁸ Nong, nne awohng awohng ki-n were taare eltuuru enahne, ye jio ji kpo rede elne ana koro yefono antahng, fere jo kak enjel, jo yiimi go nsol nyi á kil elkahne. Elkohn nne noo kpo bum elne wahre wahre mbol mbol, tib á kpo tir ntir nyehka nyehka nyi ane kpo tir.

¹⁹ Elkohn nne noo ebyake eljabbe Kraist ji li esi, ye ji kpo le ngubjing nyi kpi akon, a ajahb, nya kpo lim ngubjing jol anyehng, eji l'gbal agbal ana koro Esowo re gbal.‡

Atahm nya ane kpo tib nya foongo atingitingi atahm

²⁰ Wahn ebkpo a Kraist, fere lohng go elwo ni atohko nya njini nya. Jen ji wahnge elkpin enahne li ana, are n kpeke wob go njini? Jen ji wahnge n kpo bum atahm nyaa ana, nya bungu re,§

²¹ “Kana jo koro nsol nyio! Kana jo li nsol nyio! Kana jo lak abo go nsol nyio!”?

²² Nsol nya kpee lohngem ejumjum. Ana li no, ano wo bahke toono o tan. Atahm nyaa ana, atahm nya ane fumu no, fere kp'tibi nya.*

²³ Etingitingi, atahm nyaa kp'foongo nya nno, eji kp'tibi re, ane jo kak Esowo go bo a nsahm, ana koro bofono, fere jo rede elbo ana koro bo, fere jo bib a ngubjing ebo.† Nsol nya kpee, nsehng anyehng anyehng limm. Nyao bo kpo lim re, nob a ngubjing ebo, ana bo kp'sebe.‡

‡ 2:19 2:19 Ef 4:15-16 § 2:20 2:20 Gal 4:3,9 * 2:22 2:22 Mat 15:9 † 2:23 2:23 Luk 18:12 ‡ 2:23 2:23 1 Tim 4:1-3

3

Nk'kulu elkpín, a elkpín ní nfenfe

¹ L'jol ano re wahn ebnyahme go elkv a Kraist, yehken ntim enyahne kunu go nsol nyi li go ejahbetul Esowo, edi ji Kraist jehk no go eboblum bi Esowo.

² Kunen amahr enyahne go nsol nyio ona, kana kunu go nsol nyi njini nyia.*

³ Tibre wahn ebkpo.† Bobbehr elkpín enahne goji Kraist ji li goji Esowo.

⁴ Kraist wo li elkpín enahre. Ngare nyi á l'lohng ba, owo wahn bahke tob lohng, jol gbul gbul gbuul, fere tob tib ellub ene.‡

⁵ Owo fvfo nobo re wahn wul nsol njini nyi wob go egahne atahng, ana anebkal akono, nsol nyi ki li saang, nsol nyi kpo kor ane go ellimi, ab'bi nya kpo melle ane go bo a ntim, ebaaramahr go nsol ane, ji li ana eblom ajomo.§

⁶ Tibre nsol nyia nyi bahke wahnge erakatahng ji Esowo gbo tub ane ba kil-e elwuku.*

⁷ Wuku wuku n̄ jo tob toono mbang nyio, fere jo lim nsol nyio.

⁸ Anv, yaken nsol nyia kpee, ana erakatahng, eltim amaange, eblum alimi, ane asuku, abi aka atubu.

⁹ Kana jo kiimi afahnge tong atemtem, tibre wahn ebyake nk'kulu elkpín, n̄ nehme kpe lim eljini nio.

¹⁰ Wahn ebfare bel elkpín nfenfe ní Esowo bahke jo lim-n, n̄ jo jol nfenfe nfenfe ngare

* **3:2 3:2** Mat 6:33 † **3:3 3:3** Rom 6:2,6 ‡ **3:4 3:4** 1 Kor 15:42-43

§ **3:5 3:5** Rom 8:13 * **3:6 3:6** Ef 5:6

anyehng anyehng, tete m biingi a ye jio ji lim-n no, n fere kahn-e kpee.

¹¹ Go ege ejang, elyaange anehng anehng limm, afi jolo Grik, afi jolo Jus, afi jolo ane ba ma yehke nrur, afi jolo ane ba kala yehke nrur, afi jolo aneb ekulugbe, afi jolo akpak, afi jolo aju, afi jolo ane ba ki li aju. Kraist wo li ejum ajehng ajehng, ye j'nehm wo wob go atahng ane bao kpee.†

¹² Wahn ane ba koro Esowo, a yehk-n no re wahn jol ejahne ejahne. Fvfo, belen nsol nyi kpo fuumu aneb Esowo, ana ndon, nnoobo eljini, eltim ni li rede rede, eljolo soom, go elkpooro.

¹³ Jo kpuumen ka atemtem. N l'bel ebi bade atemtem, jo yaken ka atemtem. Ana Kraist ma tahm ka-n, tob jo tahmen ka atemtem.

¹⁴ Jo belen elkoro budu go nsol nyia kpee. Tibre elkoro ni li ana nlehke mi bo kpo ko tuuru nsol, fere jol elkpulkpu anehng.‡

¹⁵ Nong, elkoono ni Kraist ko nji go egahna ntim. Tibre Esowo ma-r yehke re wahr jol go elkoono na anehng, a ngubjing anyehng, fere jo kak-e saam.

¹⁶ Nong, alum nya Kraist jol a nahne go egahne ellong gb'gbal. Jo tiben, wahn fere jo rehke atemtem go elkahne ni Esowo kpee, eji n kpo yim ase Saams, fere yim ase ero, fere yim ase nyako nya etohko. Jo yimen go egahne atahng ka Esowo, a saam akake.

¹⁷ Ejum ajehng ajehng ji n l'lim, afi jolo elbundu, afi fere jolo ellimi, jo limen go mbing nyi Ntul a

† 3:11 3:11 Gal 3:28 ‡ 3:14 3:14 Rom 13:8-10

Jisos Kraist, a saam akake ji e kpo kak Esowo Nde sehng goji Jisos.§

Eljini nfenfe ni nne bahke jo lim go ege a nlaaga

¹⁸ Anebk'al, jo woomen alum ebahne go elwo, tibre nyao nya fuumu re wahn lim, eji n li ka Jehova.*

¹⁹ Aneblum, nong, akal ebahne jo kor-n. Kana jo marre a bo.†

²⁰ Abonse, jo wuken babnso ejahne, a babnne ejahne go mbang anyehng anyehng, tibre jia ji kpo kor Jehova.‡

²¹ Afono abon, kana jo bib a abon ebahne, eji ntim l'k'jo woono bo.

²² Aju, jo kaken babnso ejahne go nsol kpee. Kana jo lim eltum ngare nyi nne kp-n nyehne wo wo, tib eji á l'jo tehk-n. Jo limen eltum go eltim anehng, tib go elfahle ni n kp'fahle Nso ejahne no li go ero.§

²³ Eltum anehng anehng ni n kp'limi, jo limen a ntim a ntim enyahne kpee ana ane ba kp'loko Jehova, ba kil loko ane.

²⁴ Jo buumen re, Jehova wo bahk-n tuuru, fere ka-n nsol elehke elkv enyahne. Tibre n kp'loko Ntul a Kraist.

²⁵ Nne no kpo lim ab'bi, bo bahk-e tuuru ana á limi ab'bi, tibre Esowo kpehme rang nnene.

§ 3:17 3:17 1 Kor 10:31 * 3:18 3:18 1 Pit 3:1 † 3:19 3:19 1 Pit 3:7 ‡ 3:20 3:20 Ef 6:1 § 3:22 3:22 1 Pit 2:18

4

¹ Babnde aju, jo filen aju enyahne nob nob go mbang anyehng anyehng, wahn fere jo buumu re, n tob kpi Nde go ejahbetul Esowo.

Erehke ji Pol gohro rehke aneb ero

² Belen ekakesehk go ero akake.* Jo kunen ekpu ana n kp'kake ero, wahn fere jo kak Esowo saam.

³ Jo tob kaken ero fvfo ka-r, eji Esowo l'lennge mbang ka-r, e jo bung akpokosi alum nya Kraist tong ane. Tibre alum nyao nya wahnge n wob go agbekobo.

⁴ Jo kaken ero, eji n l'jo bung go mbang nyi bahke jo lennge alum Esowo, ana fuumu re me m bung.

⁵ N l'woomo go ellong ane ba ki li aneb Esowo, jo bangen! Kana jo ranngere ngare enyahne mbol mbol!†

⁶ Jo bungen yebe yebe ngare anyehng anyehng, wahn jo semme akang, eji n l'mal jo faange nne awohng awohng nnooba nfaange.‡

Atem Pol ba bo jo lim eltum ano

⁷ Mmonanne ejahre Tikikus ji kpo sahb kor-r kor bahk-n tongo kpee bada name. Á li nkake-sehk a nlokeltum no Jehova, no kpo tob lim eltum n'nehm ana wahr.

⁸ Ano wo wahnge n tum-e tv-n, eji á l'ba nyehn ana n kp'limi, fere kak-n eltim.§

* 4:2 4:2 1 Tes 5:17 † 4:5 4:5 Ef 5:15-16 ‡ 4:6 4:6 Ef 4:29; Mak 9:50 § 4:8 4:8 Ef 6:21-22

⁹ N tumu ye, fere tum Onesimus,* ji li nkake-sehk a mmonanne ejahre no kpo kor-r s'sehng, ye ji wob go egahne ellong. Bo bahk-n tongo ejum ajehng ajehng ji kp'limi ga.

¹⁰ Aristarkus ji e wob ngbekobo ano kp-n kake nnyo.† Ano wo fvfo Mak,‡ ji li mmon a Barnabas kp-n tob kak nnyo. M ma-n tohko tong bada ne re, á l'ba go egahne, wahn vvr-e.

¹¹ Jisos ji bo kpo lung-e re Justus kp-n tob kak nnyo. Ane baa ana ba li aneb Jus, ba e kpo lim eltum ano a bo, ni Jehova, a etul ebe. Bo jo kak-m eltim sehng.

¹² Epafras ji lohng go egahne ellong kp-n tob kak nnyo.§ Á tob li nlokeltum a Jisos Kraist, no kpo buum-n go ege ero bi á kpo kono elkake ngare anyehng anyehng. Á kpo kak ero, jo nok re wahn yiimi t'tahne, fere gbal, jo kahn ana m bahke jo toono mbang nyi Esowo, k'bel nfaabe anyehng anyehng.

¹³ N kpo yiim-e ntianse re á jo limi eltum sehng ka-n, fere tob jo lim ka ane ba li go Laodisea, a ane ba li go Hierapolis.

¹⁴ Luk ji li nlimakahm no kpo kor-r s'sehng, ye a Demas, bo kp-n tob kak nnyo.*

¹⁵ Kaken abonanee ba li go Laodisea nnyo kam, wahn tob kak Nimfa nnyo, nnenkal no aneb ero bandiki kpo song kono go ege etahk.

¹⁶ N l'lung nwer nyia mal, tumen tv aneb ero ba li go Laodisea,† bo tob lung fvfo, wahn tob lung

* **4:9 4:9** Fai 10-11 † **4:10 4:10** Elt 19:29; 27:2 ‡ **4:10 4:10** Elt 15:36-41; 2 Tim 4:11 § **4:12 4:12** Kol 1:7-8 * **4:14 4:14** 2 Tim 4:10-11; Fai 24 † **4:16 4:16** Ell 3:14

nwer nyi aneb Laodisea bahke tumu tv-n.

¹⁷ Tongen Arkipus re á jo lim eltum ni Jehova m-e ka go nseenga nseenge.‡

¹⁸ Me Pol, mefono wo kp'nyono nnyo mia mi n kp-n kake go egame ebo. Kana yini agbekobo enyame! Nong, nnoobo nyi Esowo jol a nahne.

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4